

Et non fagades ende al por ninguna manera, so pena de çient maravedis de la moneda nueva a cada vno de uos, et demas a uos et a lo que ouiesedes me tornaria por ello. Et de commo esta mi carta vos fuere mostrada et la conplierdes, mando a qualquier esscriuano publico, que para esto fuere llamado, que de ende al omne que esta mi carta mostrare testimonio signado con su signo porque yo sepa en commo conplides mio mandado; et non faga ende al, so la dicha pena et del ofiçio de la escriuania. La carta leyda, datgela.

Dada en Yliescas, XIII dias de agosto, era de mill et trezientos et sesenta et nueue annos. Yo, Velasco Perez, de la camara, la fiz escreuir por mandado del rey. Ruy Martinez. Johan Perez, vista. Fernand Sanchez. Pedro Ferrandez. Johan Sanchez, registro.

### CLXXX

**1331-IX-19, Segovia. Carta abierta de Alfonso XI al concejo de Murcia, notificando que había escrito a don Juan Manuel sobre el caso de doña Guillamona, vecina de Murcia, a quien los alcaldes de Molina Seca habían impedido ejecutar la deuda de 5.000 maravedís que Pedro Gómez de Jovar y su mujer le debían. (A.M.M. C.R. 1314-1344, f. 108v).**

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçeio de la çibdat de Murçia, salut et graçia.

Sepades que vi vuestra carta que me enbiastes en razon del agrauio que don Johan, fijo del infante don Manuel, faze a donna Guillamona, vuestra vezina, mujer que fue de Porçel Porçel, en que defendio a los alcalles de Molina Seca que no le feziesen execuçion et paga de los çinco mill maravedis que Pedro Gomez de Jouar, su vasallo, et Mayor Galindez, su muger, le deuen por la heredat que della conpro.

Et sobresto yo mande dar mis cartas, quales entendi que conplia, a Manuel Porçel, personero de la dicha donna Guillamona, para el dicho don Johan, porque le faga fazer conplimiento de derecho et paga de los dichos maravedies con bienes de los dichos Pedro Gomez et su muger, segunt le son obligados et se deue fazer de fuero et de derecho.

Et sy don Johan esto no feziere, fazedmelo saber por vuestra carta, et yo fare porque la dicha vuestra vezina aya conplimiento de derecho et cobro de lo suyo.

Dada en Segouia, XIX dias de setiembre, era de mill et trezientos et sesenta et nueue annos. Yo, Pedro Ferrandez, la fiz escreuir por mandado del rey.

